

龍門志

天下

也龍

日夕

浮翠

於海

大巡

河北大學圖書館 編

# 河北大學圖書館藏 稀見方志叢刊

河北大學  
圖書館藏

國家圖書館出版社

之勝槩也天下之人慕龍門之勝者

先生命河津令樊子朔造鐵鍊惠及無

河北大學圖書館 編

河北大學圖書館藏稀見方志叢刊 20

國家圖書館出版社

(明)韓邦靖撰

【道光】朝邑縣志一卷

鈔本

# 第二十册目錄

【道光】朝邑縣志 一卷	一
【嘉慶】西域總志 四卷	四五
【嘉慶】玉門縣志 一卷	三二三
【嘉靖】龍門志 三卷	三五五

朝邑縣志

明韓邦靖撰



朝邑縣志

前序一首

余讀郡邑志蓋將極天下之撰矣然益繁而不能詳晦而不能白亂而不能理焉此安在於志耶夫志者記也記其風土文獻之事與官乎是郡邑者可以備極其改革省見其疾苦景行其已行察識其政治使天下為士大夫者讀之足以興為郡邑者讀之足以勸而已然非以誇靈勝之迹崇獎飾之細也而撰者之志每不皆若此焉且何以觀也朝邑令陵川王君蒞縣之明

年以五泉韓子汝慶所撰朝邑志刻成謂予宜  
序諸首予讀五泉子之志異而歎焉曰嗟乎此  
吾五泉子之所以為志也歟置縣沿革與山川  
故蹟官署諸事惟歸諸總志此天下之所通見  
而不能裁者斯予之所謂繁而不詳晦而不白  
亂而不理者矣今畢以反之矣名宦所以志其  
官師之行事人物所以備其豪俊之餘烈其恐  
猶有所遺而未盡也括之以雜記開卷之際凡  
川源改革之異文獻散失之舊皆縷陳而無憾  
矣使郡邑之志皆若此其奚有不可也王君名



道字純甫作縣而能先事於此此可以徵其政也正德十四年己卯九月十又八日己酉游西山人康海序

自序一首

朝邑舊有志然不載高御史及劉烈女事二人者代不數人顧可弗錄耶非也竒異如程濟善終如周或寵任如楊恭迺畧而不書沮水入渭蓋數千歲近時迺徑入河川源改革此其大者而弗著後之人何考焉他可知矣縣尹陵川王君曰是志且不傳然烏可以但已耶迺以屬五

泉韓子韓子於是乎編焉夫昔人之為朝邑志也豈不自以為善哉然後之人迺有議而更之者豈非一人之見有時而窮耶今之志如斯也夫今人之見猶昔人也夫其繁簡取與之間其可議者吾不知其有幾也後之君子各以其所見刪補而更正之猶今日焉斯為全志矣豈不善歟今志凡七篇正德己酉二月六日五泉韓邦靖書

總志第一

朝邑為縣起自西魏以據朝坂故名朝邑古為

冀州之地殷周時為芮國有大荔戎秦厲恭公  
伐大荔取其王城築高壘以臨晉國更名臨晉  
後晉奪河西之地乃以屬晉魏獻河西之地於  
秦乃復入秦漢為臨晉縣隸左馮翊有河水祠  
有芮鄉晉亦為臨晉縣又為左馮翊治後魏分  
置南五泉縣隋置長春宮尋復為朝邑縣唐亦  
為朝邑縣有河水祠西河祠武德中析為河濱  
縣又為河西縣以隸河中府大歷中復為朝邑  
縣隸同州迄今因焉而以隸陝西西安府同州  
于天文為參之分野東有太慶關又東至于河

東為蒲州蒲州者山西屬州也西有鐵廉山又西有高陽城又西至于興舖西為同州北有長春宮又北有苦泉又北至于金水河北為邠陽南有漆沮又南有太白池又南有麻子池又南至于渭南為華陰西南有沙苑城又有九龍池戶凡八十二里成化末歲大饑民多餓死又多亡去乃更為七十二里正德五年又去其七里今為六十五里云縣先在西原上有相地者云城居高而左下法不利知縣後其言稍稍驗乃更移置原下然無城景泰初知縣申閏築焉方

三里有奇東門一西門二北無門南門一城中  
東偏為縣衙縣衙南為西安行府府南為儒學  
文廟在焉儒學南為按察分司西為布政分司  
布政分司北為城隍廟城隍廟北為陰陽學及  
醫學倉凡三所一在縣一在學一在城西原上  
壇凡三所社稷壇在城西北山川壇在城南邑  
厲壇在城北草場二所一在城西一在山川壇  
東養濟院在城南教場在城東桑棗園在教場  
西漏澤園在山川壇南鋪凡一十八所在城者  
一城西者二城東者三城南者三城北者五西

北者三社學凡三十所一在城一在柳村一在  
新市鎮一在趙渡鎮一在趙村一在南陽洪一  
在永興鎮一在太慶關一在白塚一在龍池一  
在龍門村一在白村一在辛城寨一在兩女鎮  
一在倉頭一在救駕莊一在許村一在顧現一  
在延壽一在王家莊一在八里莊一在泊子村  
一在嚴伯一在步昌一在苦泉鎮一在霸城一  
在小伏坡一在白池一在小村一在口口  
太慶關在縣東三十里卽古蒲津關今設巡檢  
司隸潼關衛又置稅課局關東卽黃河西岸岸

去水不甚高。然不溢。他處或高四五丈。輒溢。土人以為鐵牛鎮河。故不溢。鐵牛者。唐時鑄鐵為牛。置河兩岸。各四牛。各重數萬斤。下為鐵山。尾施鐵軸。以繫浮橋。旁置鐵人。以象繫牛。宋嘉祐中。河漲。橋壞。盡曳西岸牛於河。元有僧懷丙者。乃為機法。取牛河中。已得三牛。會有言取牛不難者。丙怒。棄去。後人用其法。取牛。然牛竟不出。今西岸止存三牛。其一牛。乃在河中。始河漲時。并壞岸。元鐵判院仝僉。修築焉。西北為大荔。戎城。卽王城。左傳。陰飴甥與秦伯盟於王城。卽

此地後改為武鄉今廢唐玄宗過蒲關詩云鐘  
鼓嚴更曙山河野望通鳴鑿下蒲坂飛旆入秦  
中地險闕逾壯天平鎮尚雄春來津樹合月落  
戍樓空馬色分朝景雞聲逐曉風所希常道泰  
非復候繻同

漆沮一名洛水自耀州同官縣來至朝邑東南  
三十里入渭成化中乃崩入河水北有新市鎮  
宋元置稅監又有饒益寺寺中舊有藏春塢貯  
古名賢石刻今不存獨殿壁上有宋賈炎諸人  
題名石金趙抃記曰左馮之東南踰三十里縣



曰朝邑由縣之直南林木蒼鬱小徑縈紆約有  
十里有鎮曰新市鎮有寺曰饒益乃陝右之名  
藍也路當秦晉要衝枕山河之形勢自唐宋以  
來名臣賢士經由往返莫不稅駕投憩于此或  
題名於壁或畱詩於碑不可勝數前後主僧慮  
歲漫滅悉勒之于石寺遭兵火焚毀殆盡如前  
人石刻往往埋沒於頽垣遺基之下抃承乏命  
領鎮事至此恨不及見饒益全盛之時實為不  
足每暇日命童僕事錫築搜抉于荆榛瓦礫之  
間雖獲名公大臣之行記詩刻例皆斷折訛缺